

Cantu di lu metiri

Quantu è beddu 'u bon campari!...
Prima u metri, e poi u pisari:
Lu pisari ccu lu metri,
Picchè l'omu 'unn'è ri petri.
No, ri petri nun è l'omu,
Lu limiuni nun è ovu.
Nun è ovu lu limiuni,
Nun è fauci lu zappuni:

Lu zappuni nun è fauci,
A li mastri pugna e ccàuci
Pugna e ccàuci a li mastrazzi;
Li linzola 'un su' bisazzi
Li visazzi 'un su' linzola.
Fauci r'oru, vola, vola,
Vola, vola, ni sta 'mpara.
Cutiddati a li nutara.

'E' nutara cutiddati.

Li cutedda non su' spati.

Non su spati li cutedda,
Lu panaru 'unn è crivedda.
La crivedda 'unn è panaru,
Ni li detti è lu massaru.
Lu massaru è ni li detti,
non su tenchi li muletti.

Nun si sicca ni la messi;
la massara fila e ttessi.
Fila e ttessi la massara
Cula aperti li sculara!
Li sculara cula aperti
Li scursuna 'un su lucerti
Li lucerti 'un su scursuna
Buttaneri i cucuzzuna.

Nun su' tazzi li bicchieri
Nun su Santi li varveri
Mulinara tutti latrì,
Cunzirioti santipatri.
Santi patri cunzirioti
Facci giarni li batioti
Li batioti facci giarni
Lu scarparu ha peni ranni.

E li tenchi hannu li spini,

Lampi e trona a li parrini.

'E' parrini lampi e trona:

Cc'è cu canta, cc'è cu sona,
Cc'è sona, cc'è cu canta,
Cc'è cu scippa, cc'è cu chianta,
Cc'è cu chianta, cc'è cu scippa:
Ni la messi nun si sicca.

Cucuzzuna buttaneri
Pisi fausi li chianchieri.
Li chianchieri pisi fausi
Li cammisi nun su' càusi;
Nun su càusi li cammisi,
Li sbirrazzi tutti 'mpisi.
Tutti 'mpisi li sbirrazzi,
li bicchieri nun su' tazzi.

Peni 'ranni a lu scarparu
La muggieri cci arrubbaru
Cci arrubbaru la muggieri
Arsi tutti i cavalieri!.....
Cavalieri arsi tutti:
Cu' ni scorcia, cu' ni futti!
Cu' ni futti, cui ni scorcia.
Lu lampiuni nun è torcia.